

欽定剿平粵匪方略

欽定勦平粵匪方略卷八十二 甲寅年

二月二十六日乙未楊以增奏言查逆匪踞永城

後據探分股西去今忽北竄是明知徐州兵單
乘閒窺伺現在屯住豐工上下聲言直撲徐州
又難保不於口門以下斷流之處潛圖北竄清
江距徐州之蕭碭地方五百餘里人心已覺驚
慌臣若遠離恐生肘腋之患而徐州萬分危急

又不敢顧此失彼現囑前漕臣李湘棻統帶兵勇先住宿遷保護糧臺相機前進奏入

諭曰若專待汝奏報則事事遲誤營兵家丁有可靠者皆可使令偵探軍情重賞之下必得壯士若斬茲小費是直自貽咎也

同日河南布政使鄭敦謹奏言前據歸德陳州各路探報大股匪徒陸續由正陽關潁上蒙亳

向西北竄土匪勾結人數衆多歸陳處處偏近
永城夏邑尤與該處毗連十分緊急已由撫臣
英桂迅派官兵前往但省垣重地尤應速爲籌
備臣當與臬司林揚祖會督在城文武官紳相
機布置各於五城安設礮臺晝夜巡防不敢稍
懈該匪若由歸郡北竄則下流各河口尤爲緊
要亦經會稟太常寺卿臣王履謙河臣長臻設

法嚴防惟河北鎮道現駐彰德河岸兵力甚單
查汜水北岸有防勇三百餘名地居上游該處
情形刻下尙不甚喫重自應調赴下游先其所
急並飛咨河北鎮道於所屬各要隘嚴密防堵
賊情詭譎奔突靡常臣仍當妥速布置斷不敢
以賊蹤尙遠稍有鬆懈奏入

上諭曰河北之防殊不足恃著再爲妥速籌之

鄭敦謹又奏言查夏邑東北接壤蕭碭該處豐
工池下河淤灘淺雖無船隻可乘亦可紮筏偷
渡已飛咨徐州鎮道嚴密堵截相應請

旨迅飭南河河道總督山東巡撫趕緊嚴防杜其奔竄
前已奉

旨飭僧格林沁勝保迅撥精兵一千名前來勦堵似可
遏其兇燄惟旣探有接應北路賊匪之說則江

南蕭碭河南永夏北面毗連山東等處亦須有
重兵與河南合力防守庶幾剿尤爲得力奏入
上諭曰所見尙是業經派勝保迎剿渡黃逆匪汝在省
城無一探報設若有警必致著著落後

二十七日丙申僧格林沁勝保奏言接善祿途次

函開聞有賊自碭山前來現任單縣村鎮之說
馳赴荏平探明迎剿臣等查該逆每遇竄擾各

處其行剽急異常此次旣爲救援北賊而來自
無不疾趨前進似無半途屯紮之理善祿於二
十二日統率馬步官兵三千餘名前赴豫東一
帶如係土匪滋事足敷剿辦卽實係皖賊竄至
善祿所帶官兵久經戰陣必能遏其兇鋒臣勝
保若卽於此分兵南下少則不敷調撥多則恐
北路兵單且恐該逆窺我兵力旣分乘隙撲竄

集賢堂
致餘燼又成燎原所關非細臣勝保應請

旨暫緩南行先將此股逆匪殄除再以大兵全力南注
自可迎刃而解如日內再接東豫緊報臣勝保
自應分督官兵馳往勦辦斷不敢稍有拘執現
在阜城之賊堅匿死拒必須設法攻勦方可得
手連日挑築長濠業經竣事臣已飭各官兵晝
夜嚴防並令投出潮勇蕭良芳等於出隊時遙

向賊壘諭以利害散其黨與使知被脅者有可
生之路從逆者無倖免之誅賊勢旣孤攻勦較
易

僧格林沁勝保又奏言直隸提督張殿元經督
臣桂良飭令帶兵一千二百名在武邑防堵查
武邑在阜城西五十餘里現在長圍已合逆匪
欲竄不能該處似無須多設防兵臣等竊思善

祿魁福已帶兵由德州在平順運河一帶相機迎剿恐賊聞官軍大至或折向西路乘虛竄入大名臣等已令張殿元帶兵改赴大名一帶扼要防堵其原帶官兵內有吉林馬隊三百名本係桂良截留但馬隊利於追剿抄擊臣軍營正因馬隊缺乏不敷調遣已飭調前項馬隊三百名來營助剿另撥隨營通永宣化步隊官兵四

百名統歸張殿元帶赴防所

同日桂良奏言查大股逆匪欲向武邑奔竄武邑距阜城僅四十里最爲喫緊雖據勝保咨稱該逆欲竄不能然遑爾撤防恐賊情詭詐乘虛而至如果逆匪奔竄必須迎頭截擊非馬隊不能得力臣現在咨會勝保將調去吉林馬隊三百名仍行撥回交張殿元留於武邑嚴密防堵

至安徽逆匪竄徧豫境直隸大名一帶防堵亦屬緊要臣擬派副將達年由省統帶官兵馳赴大名會同該鎮道督飭地方營汛於要隘處所相機設防以資保障均奏入

上命軍機大臣傳諭僧格林沁勝保曰據奏查探東豫賊情請暫緩分兵南下如所奏果係確情則現在善祿帶兵南下自己足敷勦辦勝保暫緩分兵亦係通

籌全局之計雖此數處土匪蠢蠢初未可定且卽
係土匪亦難保無勾結逆黨先爲嚮導情事朕所以
命勝保進駐德州者原因阜城之賊日久未滅慮其
與南賊勾連是以斟酌再三爲此南北兼籌之策該
大臣等身在行閒既有此奏自必確有把握原可不
必拘泥前旨如東豫之賊實係皖賊大股業經朕先
事豫籌而該大臣等以大意誤事朕亦不能曲宥至

所稱先將此股逆匪殄除再以大兵全力南注自可
迎刃而解究竟此股逆匪何時可以殄滅大兵何時
可以南下該大臣等徒事遷延坐令南北大局爲此
垂斃之賊所牽掣豈不更墮奸計善祿已馳赴荏平
諒已探明南賊確情惟距大營稍遠若事事由該大
臣等轉奏不免耽延著傳知該將軍凡一切進剿機
宜及逆匪情形均准其一面馳奏一面知照該大臣

等以期迅速武邑防兵據該大臣等奏請移赴大名
頃據桂良奏報則稱武邑未可撤防馬隊仍須撥回
並另派副將達年赴大名設防著該大臣等酌度緩
急毋致疏失

二十八日丁酉琦善奏言查直隸帶兵官惟參將

鞠殿華陷陣衝鋒不避艱險其驍勇善戰一時
罕匹自上年到場以來戰功屢著此次直隸弁

兵紛紛逃走而提標中營逃兵尙少提臣陳金
綬人極醇謹未免過於長厚其精力雖尙強健
亦非復少壯氣體惟該提督尙能虛衷受益不
至意氣用事貽誤事機近日江中賊船往來上
下絡繹不絕前獲奸細供稱由和州前來探聽
六合儀徵揚州官兵多寡臣已分飭沿江各營
嚴爲之備又探賊船溯江而上攻擾黃州督臣

吳文鎔退至麻城誠恐武昌兵燹之餘難資控扼廬州賊勢猖獗蒙城一失將由永城以窺歸德由蕭縣以窺徐州方今決河未塞河身乾涸可以長驅而過山左兗沂一帶處處戒嚴臣已飛咨和春福濟與河臣楊以增山東撫臣張亮基給事中臣袁甲三嚴密防堵奏入

諭曰所論陳金綬誠爲公當鞠殿華在二年夏閒推

并山西參將引見時朕見其漢仗好箭射有準特旨
仍留直隸不料該員能如是出力雖有逃兵亦難吹
毛求疵

同日

詩軍機大臣傳諭僧格林沁勝保曰昨據桂良奏武
邑未可撤防已諭令僧格林沁等酌度辦理朕思單
縣一帶現有匪徒竄擾若由單縣西竄則直隸東明

開州等處與東境毗連大名一帶甚覺空虛以目前情形而論阜城現爲賊踞武邑自未便撤防若統籌全局則南來賊衆已至單縣是大名一帶尤不可不早爲布置總之阜城逆匪急當剋期勦滅若再事遷延致令垂斃之賊牽掣我師而南來賊匪闖入直境該大臣等貽誤之罪豈能稍寬耶

上又命軍機大臣傳諭桂良曰武邑逼近阜城防堵固

屬緊要但大名爲扼要之地現在皖賊由碭山偷渡
黃河擾及單縣儻沿河西竄從東明開州等處乘虛
窺伺則大名係入直門戶亟應添兵駐守本日已諭
令恆春將前調澤潞官兵一千名毋庸馳赴河南卽
前往大名一帶交張殿元調遣著桂良飛飭該署提
督迅往大名扼截至阜城逆匪當可指日殲除然亦
難保不因被勦情急突圍逃竄桂良務當督飭文武

員弁兵勇勤加偵探實力防剿軍情變幻靡常該督
仍當與僧格林沁等隨時知照酌量緩急妥爲布置
上又命軍機大臣傳諭恆春曰現在阜城竄匪尙未殄
滅淨盡南來之賊如由單縣沿河西竄則曹州濮州
卽與直隸大名接壤永城夏邑等處聞係土匪竄擾
較之單縣一帶情形稍緩所有前次諭令抽撥之澤
潞防兵一千名著毋庸馳往河南卽令直赴大名歸

張殿元統帶以資防剿

上又命軍機大臣傳諭桂明曰賊自碭山渡河有現踞單縣村鎮之說善祿等已帶兵馳往剿辦但恐該匪由曹單西竄直隸大名等處甚覺空虛本日已諭桂良飭令張殿元帶兵馳赴該處防剿桂明仍遵前旨星速徑赴河南歸德一帶探明賊蹤何路緊急卽由何路迎剿毋得遲延

上又命軍機大臣傳諭百勝王夢齡曰渡河賊匪已竄至單縣其屯聚包家樓之賊現又竄往何處是否尙在該處占踞近日有無賊匪續行偷渡百勝等作何布置前據袁甲三奏賊匪係分三起陸續北竄其盤踞河岸之土匪旣將前股賊衆導送渡河安知續來逆匪又不藉爲嚮導著百勝等卽就現在所帶兵勇一面保守郡城一面竭力堵剿將此股盤踞賊匪剿

滅淨盡其南路軍情仍著隨時奏報

二十九日

戊戌

台湧奏言查黃陂孝感兩縣均距

漢口較近是以臣商令已革提督佈克慎擇於

兩縣居中之楊店扼紮十一日據佈克慎函稱

黃陂有大股賊匪二三千人於初七初八兩日

攻撲該縣城池初九日城卽失守十七日佈克

慎由新店進紮距黃陂縣城二十里之廖公鋪

探聞賊衆在縣城盤踞遂派兵三路進攻十八日董玉龍帶兵攻小西門分兵一隊由東門突攻而入賊蒼黃失措當經殺斃多名董玉龍已由小西門攻進橫衝截擊斃賊無數伏賊突出復經佈克慎督兵擊敗該逆仍敢登高死拒我兵舉火將房屋焚燬敗匪沿城奔逃官兵追至南門外河岸賊匪無路可奔紛紛撲河淹斃黃

陂現已克復其另股賊匪竄至孝感縣屬之李家灣小河溪一帶伏思漢陽漢口賊悍且衆此股不滅則省城與江北阻隔不通而欲攻復漢陽漢口非俟兵力稍厚先將江北雲應黃孝等縣分竄各股賊匪捕剿淨盡難以進攻現惟仍飭各路帶兵將備嚴密搜剿竄匪再併力爲攻復漢陽漢口之計至此各路剿賊文武員弁

兵勇可否由 臣 擇其尤爲出力者酌量奏保奏
入

上命軍機大臣傳諭台湧曰前據崇綸等奏漢陽逆匪
半係烏合長髮老賊爲數無多自不難剋日埽除該
督務當乘此聲威將孝感一帶賊匪迅速殲除一面
督兵收復漢陽保衛武昌一面與駱秉章曾國藩迅
籌剿辦務將岳州湘陰等處逆匪次第殄除毋得株

守德安僅派弁兵搜捕零匪致誤大局荆襄一帶是
否有賊匪上竄仍須督飭文武員弁實力防守

上諭內閣曰漢陽漢口賊匪膽敢分擾黃陂等縣經台
湧分兵剿擊獲勝克復縣城賊鋒已挫辦理尙爲妥
速所有在事文武員弁准擇其尤爲出力者酌量保
奏仍著台湧督飭官兵將孝感縣屬李家灣等處股
匪趕緊殲除並卽乘勝攻克漢陽漢口務將楚省賊

氛速行掃蕩

同日和春福濟奏言二月初六日逆匪攻撲營盤經臣和春督同鄭魁士帶兵擊剿賊膽已寒自應乘勝奪取城池二十日早派總兵吉順等分路進剿臣和春居中調度天明取齊三里岡距城甚近而東門外街市房屋早爲該逆占住又有小河及護城河兩道河邊均築有營壘原

有木橋被該逆拆毀鄭魁士首先帶兵前進紮
筏渡過小河該逆突出千餘人迎拒適後路官
兵趕到合力奮擊逆匪紛紛敗退我軍槍進柵
欄立將木柵拆毀一面放火將街市房屋全行
燒燬全玉貴進攻小東門賊匪上前迎敵各勇
槍礮連環斃賊無數逆匪不敢入巢全玉貴揮
令兵勇槍進賊營當將營壘拆毀江忠濬等進

攻北門城外賊營數座該逆以槍礮回擊堅守
不出各勇拋擲火罐賊營登時火發匪徒驚潰
後路接應官兵趕到齊力追殺斃賊多名卽將
營盤平毀此戰自卯至午三路官兵接仗四時
之久約斃賊匪四五百名除再行設法進剿迅
圖克復外並飭西路總兵珠克登等一體移營
會剿

和春福濟又奏言總兵秦定三由江南前來於
二月二十日到營並未帶兵如由此閒另派官
兵管帶則將兵隔膜呼應不靈斷難應手相應
再行請

旨卽飭向榮將秦定三原帶貴州鎮遠銅仁松桃丹江
等營官兵一千名派令星馳來廬以便帶領督
剿奏入

上命軍機大臣傳諭和春福濟曰據百勝等奏賊匪於二十日全竄東省而竄回永城之賊距徐甚近著和春福濟卽飭秦定三迅帶官兵馳往徐州相機進剿其所調貴州官兵一千名到皖需時尙恐緩不濟急現在黃河南北情形緊急無論何項官兵皆可交秦定三帶領星速赴徐州一帶勦辦逆匪並遏南來之賊與潁亳永城等處聲勢亦可聯絡斷不准任令賊

匪再行偷渡河北致滋蔓延

上又命軍機大臣傳諭向榮曰現在賊由蒙亳永城夏邑竄至徐州渡河擾及山東境內已諭和春飭令秦定三帶兵赴徐剿賊著向榮仍遵前旨迅將秦定三原帶之貴州鎮遠等營官兵一千名飭令馳赴廬州軍營至金陵現在籌辦攻剿情形日久未據奏報該大臣坐擁重兵耽延時日既不能迅速克復又不肯

撥兵協剿移緩就急坐視賊匪蔓延是誠何心向榮
於接奉此旨後迅速撥兵赴援仍著設法攻克金陵
以贖前愆

同日張亮基奏言前聞賊竄永城臣已嚴飭單
縣文武各員豫爲布置而金魚兩縣則係豐工
漫溢連年災歉之餘民窮財盡守備單弱知州
黃良楷聞金鄉危急由濟甯帶練勇五百名馳

往救援途遇難民聲稱二十一日午後賊擁入
城縣官不知下落查賊匪竄近單縣經該營縣
截擊獲勝尙可乘此銳氣實力堵剿金鄉孤城
失守賊必進撲濟甯臣卽由山道馳赴濟甯迎
剿餘仍飭單縣營縣嚴行防禦並飭查金鄉縣
城內文武下落另行辦理

張亮基又奏言臣現因金鄉失守由山道徑赴

濟甯並飛咨將軍善祿由東昌一帶馳赴曹州
相機進剿兼遏該逆由曹屬旁竄直隸之路奏
入

上命軍機大臣傳諭善祿張亮基曰刻下賊匪竄至金
鄉善祿自應督兵迎探賊蹤所向扼要截擊萬不可
墮奸匪聲東擊西之計張亮基亦當探賊所至迎頭
截剿與善祿兩路夾攻方可得手若因已派善祿帶

兵進勦該撫卽紆道遷延意存觀望貽誤之罪更將
謠諑其附近要隘若有須分兵扼堵之處或令魁福
帶兵前往著善祿張亮基酌量布置萬不可令賊匪
北竄與阜城之賊勾結臬司勵恩官帶兵駐紮宿遷
此時賊竄山東徐州亦尙有賊匪踵至或飭令該臬
司就近赴援徐州或折回山東防勦著張亮基相機
調度

同日百勝王夢齡奏言據探該逆於十六日在包家樓蔡家莊等處砍伐樹木拆毀民房紮後渡河都司崇順等帶領兵勇前往擊斃東岸逆匪多名餘匪二三千人不及渡河仍由永城回竄臣等馳抵豐工於附近各處搜獲奸細並逃出難民研訊僉稱此股逆匪分三起來徐沿途俱有土匪引導意欲由徐州陸路北趨接應直

隸逆匪臣百勝擬帶兵過河追擊乃沿河無船
可濟又據豐縣稟報逆匪二月十九日辰刻攻
破豐縣二十日已全竄東省臣等查渡河之賊
業已去遠而竄回永城之賊距徐甚近當派通
判顏培高帶領臧紆青所留練勇七百名隨同
袁甲三赴永城進剿又派參將高培等帶領大
同兵六百名前赴豐縣收復城池臣等卽於二

十三日帶兵回郡途次又派鎮標兵二百名駐紮包家樓大同兵二百名駐紮郝家集協同該處團練紳民實力防守

百勝王夢齡又奏言查上年四月逆賊由浦口北趨調派吉林密雲熱河大同等處官兵來徐嗣後各處紛紛徵調祇留大同兵九百名雖經臣等先後招募鄉勇一千數百名藉資防守而

現在除派赴袁甲三處練勇七百名派往豐縣
及各處防堵官兵一千名外存城兵勇僅千餘
名雖各鄉團練民勇臣等尚可隨時招致究係
未經訓練不足以衝鋒折銳合無仰懇

天恩飭令附近統兵大員派撥勁兵二千名星速來徐
俾臣等遇有寇警得以卽時進兵迎勦奏入

上命軍機大臣傳諭百勝王夢齡曰逆蹤飄忽無定此

次由包家樓蔡家莊等處竄渡雖經都司崇順督同
兵勇殲斃多名餘匪回竄永城所獲奸細業經訊供
分起北竄救援阜城之賊並沿途均有土匪爲之嚮
導則徐州水陸各路皆須加意設防百勝等現已派
顏培高帶領賊紆青所留練勇前往永城其河岸口
門以下務當實力堵禦秦定三現抵廬州本日已諭
和春等迅催該提督帶兵援徐並諭琦善袁甲三等

飛速撥兵會勦百勝等務當就現有兵勇併力堵勦
不得專待援兵任令南來之賊紛紛偷渡山東臬司
厲恩官現在宿遷防堵賊已由豐縣闌入山東境內
該臬司何以尙株守一隅不爲分兵兼顧之計著卽
查明具奏

上又命軍機大臣傳諭琦善曰現在大股賊匪由豐工
下游渡河已入東境擾及單縣金鄉等處其未及渡

河之賊經官兵擊回逆匪仍復回竄永城該處距徐甚近百勝等所帶兵勇尙形單弱著該大臣迅撥精兵一二千名派委得力將弁卽日管帶起程馳赴徐州協同百勝等妥籌剿辦

上又命軍機大臣傳諭袁甲三曰逆匪於十八日渡河東岸餘匪回竄永城此時該給事中折回宿州而徐州爲南北要衝旣已疏防於前致賊偷渡若再不力

遇南來賊匪任令陸續北竄該給事中國謂籌畫全局者安在現已有旨派秦定三前赴徐州一帶會剿吉連劉玉豹所帶之兵皆係勁旅著袁甲三卽將所調各兵交秦定三星速馳赴徐州會同百勝等合力堵剿

同日桂明奏言現在賊匪由永城夏邑竄入碭山縣境徐州萬分喫緊臣抵豫後如歸德一帶

情形稍緩卽帶兵馳往徐州與百勝等會合攻
勦黃河一帶賊匪尤易散竄一面飛咨河南陝
西山西撫臣迅將沿河船隻概行禁止來往以
防北竄臣惟有沿途探賊所向併力進剿不敢
稍涉遷延奏入報

同日英桂奏言查逆匪探知歸德駐有大兵未

得由豫渡河遂從永夏竄至江南礪山臣深慮
黃河下游豐北漫口水勢平緩儻該逆紮筏偷
渡卽入山東單縣等境爲直隸逆匪應援現在
東路情形較之南路尤爲喫緊臣當先其所急
擬將汝郡巡防責成南汝光道余炳燾等分駐
督率並將營中添募之勇酌留五百名駐守汝
郡派參將伊里綳阿管帶飭令何處緊急卽馳

赴何處協同堵剿逆匪雖不敢直逼歸德郡城
惟此次竄越碭山而去一經山東及江南堵擊
難保其不復來且開封府屬之蘭儀衛輝府屬
之考城均與山東曹單接壤亦不可不防而直
隸逆匪聞於二月初九日分二股竄出一往東
南一往西南豫省此時東北兩路處處可慮臣
卽馳回省城與司道面商防守事宜仍卽出省

上是之

策應歸德兼防北路隨時相機辦理奏入

三十日 己亥 恆春奏言前太僕寺少卿徐繼畬經

臣奏明前赴澤潞遼州一帶辦理防堵所有地方文武應歸其調遣惟徐繼畬係在籍革員地方文武恐存玩視可否明降

諭旨派徐繼畬督辦以期呼應較靈奏入

上諭內閣曰山西在籍已革太僕寺少卿徐繼畬現在
澤潞遼州一帶辦理防堵所有各該地方文武員弁
均著徐繼畬就近調遣

同日

上命軍機大臣傳諭僧格林沁勝保曰逆匪竄擾畿疆
已踰五月該大臣等疊次斬擒多匪每云賊勢窮蹙
何以占踞阜城後復任令堅匿死拒又將兩旬以厚

集之兵乘得勝之勢蕞爾小邑豈難攻克卽謂必須
計取又豈數日來尙未籌及坐俟賊糧食盡後聽其
仍前紛竄耶南路賊蹤渡河後攻陷豐縣逼近單縣
復於二十一日竄入金鄉逆醜愈張日趨而北設由
歧途捷徑飄忽疾走與阜城之賊一經勾結彼時該
大臣等再議前截後勦辦理更形掣肘不趁此時殄
茲窮寇一味遷延玩誤實不解是何意見朕信任僧

格林沁勝保所請無不允行必不能藉口於朝命之遙制卽僧格林沁勝保二人平日辦事性情各有所偏早在朕鑒之中屢加策勵亟望其同心合力迅奏膚公若各懷己見兩不相下以私廢公坐致貽誤絕不念朕心之焦切民生之疾苦稍有天良不應如此時事至今萬難再寬期限著僧格林沁勝保卽日將此股賊匪掃除或可不加罪譴訥庫尼素光刀神雀

刀之賜非爲該大臣等飾寵示威似此因循日久糜
餉老師律以軍法夫復何辭儻以厯奉嚴旨視爲具
文不卽奮迅圖功是該大臣等無福承受朕恩朕亦
不復再諭矣懍之

欽定剿平粵匪方略卷八十三 甲寅年

三月初一日庚子張亮基奏言探得賊於二月二

十一日攻陷金鄉後旋向西北分竄一股撲曹
州府屬之鉅野縣一股撲濟甯州屬之嘉祥縣
經該州知州黃良楷暗遣健勇伏於獨山小道
二十四日午刻該匪竄入嘉祥縣境內焚掠村
莊伏勇突出邀擊殲斃逆匪數十名是日卽據

探報另股逆匪竄至鉅野業已攻陷縣城近城
村莊盡遭焚掠查該逆渡河而北志在救援北
賊必圖迅入直境其撲嘉祥則圖由濟甯汶上
取大道北犯其撲鉅野則圖由鄆城濮州等處
徑入直隸開州等州縣閒道北犯臣由山道馳
赴濟甯曾慮該逆西竄鉅野飛咨將軍善祿由
湖路徑赴曹屬相機堵剿以遏其閒道北竄之

路今約計該將軍當行近曹屬臣已行近濟甯
東西兩路可冀分投夾攻惟該逆僞入范濩等
處則與直隸邊界處處可通必須嚴堵仰祈

諭直隸督臣迅卽派兵於大名府屬直東交界地方
分路堵截俾免南北兩賊聯合致滋蔓延又據
黃良楷馳稟逆匪於二十五日攻陷鄆城欲撲
范縣壽張東平等情該逆必係探知官兵將次

到濟故竄赴西北一帶臣現在督催練勇迅由
閒道趨赴東平一帶設法繞前迎擊惟賊情慣
於避實擣虛若聞臣由東平一帶進兵善祿由
東昌迎截恐又由僻路繞出善祿之後或由東
昌臨清邊界潛趨直隸以爲阜城逆匪接應且
聞永城賊匪仍欲陸續渡黃現在豐工以下百
餘里之乾河全在江南境內若南北兩岸無兵

扼守難免續渡北竄惟有仰懇

飭下江南督臣南河河臣徐州鎮道迅撥重兵駐守豐
工以防逆匪續渡並請

諭知直隸督臣飭屬嚴密防範奏入

上命軍機大臣傳諭善祿張亮基曰逆匪不由鄆城西
奔濮州乃折而東北欲由范縣壽張奔竄或係探知
善祿由湖路南來爲此巧避之計該將軍於中途曾

否得信趕緊由曹州折回東北繞出賊前與張亮基
兩路夾擊該省山路湖路閒道紛歧若無確實探報
偵知賊蹤所向及至官軍趕到該逆早已剽掠而去
輾轉馳逐貽誤更多該逆意在接應阜城范縣壽張
一帶旣須嚴行截阻東昌臨清尤不可爲賊關入至
運河東路汶上東平各縣下則近接濟甯上可東趨
省會該逆如經官兵攔截或肆意衝突亦須豫籌堵

禦究竟此起賊匪共有幾股是否接連而行抑係分
路抄掠急須探明情形方不至誤向他途致兵與賊
不得一遇現在能否將該逆截剿該撫與該將軍如
何聯絡聲勢賊匪究向何處著善祿張亮基迅籌合
力邀擊隨時馳奏

又命軍幾大臣傳諭僧格林沁勝保曰本日據張亮
基奏逆匪攻陷鉅野鄆城該撫擬由閒道趨赴東平

設法繞前迎擊善祿由東昌一路進兵究竟已抵何處張亮基由東平一路進兵亦未知能否卽與賊遇直隸山東交界處所路徑紛歧賊蹤處處皆可闖入而我兵來往奔馳每苦不能相及我兵稍延一日賊卽深入一步此時張殿元曾否前往大名前所謂山西澤潞官兵趕到尙需時日惟有先儘現帶之兵星夜前進隨探隨剿以遏賊鋒張殿元所帶之兵不敷

勦辦仍須於該大臣等營中派撥馬步精兵並派得力將弁統帶前往勦辦方能得手亦不得專事防堵大名致成株守至阜城之賊負嵎死拒一聞南賊將來必更急圖竄逸該大臣等旣不分兵南下又不能立將此股殲除徒事遷延是何意見著卽將布置情形飛速馳奏

上又命軍機大臣傳諭桂良曰逆賊自竄踞金鄉後分

股向西北竄逸鉅野鄆城二縣先後失守現在善祿
行近曹屬張亮基亦可行抵濟甯分東西兩路進兵
攻擊惟逆黨捨命狂奔飄忽已極若由范縣濮州一
帶乘閒分竄或南向東明西趨開州路徑紛歧大名
一帶尤關緊要著桂良嚴飭張殿元督兵前往扼截
並飛飭達年帶兵前進隨時探明賊情相機迎剿至
直隸與山東毗連各要隘無論南北兩路仍著桂良

勤加偵探飭令各該文武嚴密堵禦毋令匪蹤闖入
同日楊以增奏言接據徐州鎮道稟稱賊匪竟
有直撲徐州由荆山橋北竄之意現由黃家口
竄至黃河覓船不得將附近村莊房屋拆毀運
至包家樓平水處所紮筏偷渡等情查徐州地
方關繫緊要臣密派幹弁偵探並自蕭碭來者
均稱多係土匪祇以人數巨萬徐州兵勇過單

衆寡不敵漫口之下雖無船隻該逆有紮筏偷渡屯住單縣者有仍回永城來路者現在既有分竄恐與北路之賊連而爲一則勦辦愈難臣已飛咨山東河南撫臣各於交界處所帶兵會勦使該匪腹背受敵庶免蔓延

楊以增又奏言廬州失守後逆匪復攻陷六安潁上蒙城等處查蔣壩與臨淮一水可通日來

無數賊船在臨淮一帶游弋蔣壩船勇係運鹽之船槍礮最爲得力禮字河暫行緩堵水路可以無虞陸路有雇募練勇暨各村團練鄉勇不下二萬餘人又分設礮臺派撥各營兵丁駐防足資堵禦清江浦兵勇無多臣集各街市民勇日加訓練各鄉村安堵如常奏入

上命軍機大臣傳諭楊以增百勝王夢齡曰賊匪連陷

鉅野鄆城欲從范縣濮州等處潛入直境北路情形
緊急永城之賊尙欲續行渡黃楊以增雖距徐州稍
遠而黃河兩岸是其專轄百勝等防堵徐州爲日已
久一切布置尤應早爲豫備此時軍務總應以勦爲
防固不可空城而出亦豈有株守郡垣之理著趕緊
妥籌布置不得因有秦定三帶兵赴援遂以勦賊之
事專談之該提督也楊以增所奏蔣壩等處水陸似

皆有備而豐工口岸並未提及豈百勝等如何布置該河督竟未與聞耶著卽將籌辦情形迅速馳奏百勝等仍就現帶兵勇嚴扼河岸實力防剿若再令示城逆匪陸續渡黃朕必將百勝等從重治罪卽楊以增亦不能辭重罪也

同日湖北巡撫青麐奏言查此次賊匪竄踞大江西岸凡米廩漢口漢陽城鸚鵡洲沿江一帶

均有賊營一月以來巡防未敢稍懈二月初八日該逆由米廠放船數十隻橫江來撲初九日由三家店地方放船二三十隻官兵陸續開礮旋即收入漢口初十日鸚鵡洲有賊船向平湖門駛上官兵開礮又沿西岸遁去十三至十五日兵勇出隊直抵鸚鵡洲疊獲勝仗該逆不敢渡江然省中糧餉匱乏兵勇單薄臣前飛咨四

川督臣及將軍台湧撥兵會剿迄無覆音江西
援兵一時亦未能到至會國藩之兵屢經咨催
現聞退回湖南省城無援四面受敵勢必坐困
青麀又奏言厯計軍興以來凡保全城池之處
城外未有無接應者臣本年正月進省見省城
布置雖妥然四無應援從無此閉門枯守之法
當卽酌量各處可調之兵速爲咨調乃抵省已

逾一月而各處杳無覆音觀此情形實難保守
意見所及權不能行伏願

皇上嚴飭帶兵大臣速加振作尙可補救於將來奏入
上命軍機大臣傳諭青麐曰現在皖省及東豫情形均
極喫緊各處俱須援應卽漢陽黃州等處逆匪紛擾
亦當次第殲除青麐疊次奏報不但毫無籌畫且於
別處情形總未知悉偵探亦不能確實是以所奏軍

情於現在時勢悉皆隔膜至所稱意見所及權不能
行尤屬藉詞推諉與崇綸同在一城每次皆單銜具
奏並不會銜是青廉先自存意見青廉現已授爲湖
北巡撫統轄全省尙得謂事權不屬乎此時惟有盡
心籌畫竭力防守台湧已克復黃陂進攻漢陽當可
與省城聲勢聯絡至曾國藩所帶船礮現因賊由岳
州上竄近偪長沙該侍郎初抵長沙省城已與賊遇

不能剋期下駛著青麀崇綸就現有兵勇於城內外
審度機宜妥籌布置與台湧隨時知照盡心堵禦毋
徒坐待援兵誘過他人也

初二日辛丑僧格林沁勝保奏言查該逆自竄踞

獨流靜海疊經官兵痛剿現在長濠窆竣加以
大礮轟擊偪令出巢一面嚴飭各營防其衝撲
必當和衷商推悉心籌辦俾此賊速就殄滅至

東豫賊蹤疊據山東河南咨報已由豐碭竄擾
夏邑金鄉鉅野鄆城單縣各地方但賊衆僅數
千人善祿張亮基現已分投迎勦足資堵截如
能挫其兇鋒自可無虞北犯僞賊仍猖獗臣勝
保卽當選帶官兵馳往督勦

僧格林沁勝保又奏言接據善祿函稱行抵東
昌探報賊陷鄆城於二月二十七日竄入張秋

鎮距東昌不及百里賊衆約四五千善祿卽日帶兵迎擊等語伏思善祿遇賊接仗再得重兵隨後接應固可遏其兇鋒但阜城之賊大兵合力圍攻不久當可殄滅臣勝保若移師南向馬步官兵約需萬餘統計臣等所帶官兵除善祿管帶赴東暨派防各路外尙存三萬有餘僅敷圍剿今驟撤兵萬餘未免卽形單薄臣等再四

商酌與其分兵移紮使垂斃之寇死灰復燃不
若合力剿除使南賊勢孤兇鋒易滅卽使東省
喫緊必應分兵馳往亦須俟善祿接仗後酌度
情形以定行止現已派總兵桂齡帶西甯固原
河州得力官兵一千名台祿帶吉林馬隊二百
五十名馳往德州駐守爲善祿後路聲援如果
賊勢甚張臣勝保卽督帶馬隊前進一日可至

德州惟北路兵單不敷剿辦阜城以北並無賊蹤固安涿州防兵似可一律進駐河間獻縣一帶俟臣勝保分兵南向卽令移至阜城由臣僧格林沁調遣奏入

命軍機大臣傳諭僧格林沁勝保曰逆匪竄入張秋鎮善祿卽日帶兵迎擊此時尙未遇賊接仗如果賊勢狡猾勝保自應移兵進剿阜城迤北兵力尙形單

弱仍應添兵協剿惟固安等處防兵均係保衛京師
亦難全數調往本日已諭令載齡派雙禧穆輅各帶
兵一千名馳往獻縣一帶如勝保前赴德州卽將此
項官兵調往大營以資攻剿南來賊衆約四五千
人前此善祿魁福共帶兵三千名該大臣等現又派
總兵桂齡帶西甯固原河州官兵一千名台祿帶吉
林馬隊二百五十名兵力似足敷剿辦儻必須勝保
前

往亦不過酌帶精兵數千何至撤兵萬餘目下情形
總當迅將阜城逆匪全數殄除則南來之賊聞風膽
落萬不可以賊匪堅守爲詞再延時日

上又命軍機大臣傳諭載齡曰據僧格林沁勝保奏請
撥防兵進駐獻縣等語著載齡卽派雙禧穆輅將原
帶防兵各一千名迅速管帶馳往河閒獻縣一帶聽
候僧格林沁等調遣現在阜城之賊尙未殄滅徐州

渡黃逆匪已擾及山東境內直隸大名等處防堵均
關緊要雙禧穆輅現今帶兵前赴河間近畿一帶尤
當加意嚴防是否應須分撥布置之處卽著載齡酌
量情形妥速籌辦並飭各路帶兵大員嚴密防範毋
得稍有疏虞

同日駱秉章會國藩奏言逆匪竄陷岳州後乘
風直過洞庭湖於二月初六日竄入湘陰縣城

該縣文武不知下落賊船已抵靖江喬口一帶
約數千號查靖江距省僅五十里所有省城守
禦事宜臣駱秉章會同臣鮑起豹妥爲布置惟
靖江汊港紛歧水陸兩路可通河西之甯鄉而
至益陽湘潭等縣臣駱秉章當卽札委知縣王
鑫統帶練勇一千六百名先由陸路馳往靖江
一帶截勦適臣曾國藩亦已抵省飭派生員曾

國葆及同知趙煥聯訓導儲致躬分帶陸路湘
勇三營前赴喬口合擊臣略秉章復添委知州
朱孫詒等管帶練勇六百名勝勇百餘名前往
策應王鑫先在杉木橋地方見有賊匪上岸據
掠當卽率勇迎勦擊斃賊匪奪獲船隻十三日
戰於新港河岸賊匪抄尾殺至經帶勇之王文
瑞抵住兩路鏖戰殺斃賊匪百數十名燒其大

船十餘號復經帶勇之謝仁峻李若霞在於所
守隘口擒斬多名共計生擒殺斃及落水死者
約數百人我勇膽氣愈壯現在趕造浮橋整隊
前進曾國葆在新康一帶擊斃長髮賊三十餘
名奪獲米船二隻馬匹多件儲致躬委赴靖江
聞賊分竄甯鄉當卽商同趙煥聯前往援勦儲
致躬率勇由龍塘灣殺進西門又殺至北門轉

至南門共殺斃賊匪三百餘名落水者不計其數不料轉至南門該匪復於東城外突出二三百人儲致躬帶勇追殺身受十餘傷當卽陣亡賊匪亦敗竄下船連夜逃赴靖江全數下竄喬口等處臣等隨添委副將塔齊布管帶撫標兵丁及湘勇寶勇共一千二百名又委候補道胡林翼管帶黔勇六百名千總周鳳山等分帶練

勇各五百名均由陸路會同王鑫等馳赴喬口
湘陰一帶極力攻勦並飭委千總楊載福生員
彭玉麟分帶水師八百名配齊船礮順流跟追
臣等仍隨時察看如須續添兵勇亦卽會商辦
理武陵縣訓導儲致躬追賊陣亡籲懇

天恩從優賜卹署甯鄉縣知縣馬丕慶岳州城守營參
將烏拉理未能堵禦請

旨革職審辦臣駱秉章與提臣鮑起豹均有地方之責
未能先事防範應一併交部議處奏入

上諭內閣曰賊船竄入湘陰縣城並靖江喬口一帶經
駱秉章等派令知縣王鑫等帶勇截剿王鑫在杉木
橋地方曾國葆在新康一帶均能迎擊疊獲勝仗著
卽督飭文武員弁跟蹤進剿儲致躬帶勇殺賊身受
多傷陣亡實堪憫惻著交部從優議卹岳州城守營

參將烏拉理於賊匪竄擾岳州時不能進剿失陷城池署甯鄉縣知縣馬丕慶不能極力堵禦均著革職拏問如訊有畏葸逃避情弊卽著從重治罪駱秉章鮑起豹未能先事豫防均著交部議處其失守地方文武下落著卽查明具奏

駱秉章又奏言伏查該逆先踞黃州時下通皖省實爲心腹大患臣將滇兵楚勇併令馳往皖

省救援嗣聞該逆已由黃州上竄漢陽等處正
擬派撥兵勇前往援剿詎因連日北風該逆遂
卽乘舟上駛竄陷岳州現在南省兵丁及調到
鎮筸營弁兵僅及四千有零若於各營中酌量
抽撥雜湊成軍派員統帶則兵不知將將不知
兵平日旣不相習臨時難期應手是以厯次剿
辦土匪及此次派出追剿者俱係臣與曾國藩

召募自練之壯勇較爲得力且該逆現已竄至
湖南鄂省情形較緩擬俟南省剿辦事竣臣卽
派撥兵勇馳往鄂省跟蹤追擊奏入

上諭曰楚南之賊明係分竄會國藩礮船原爲肅清江
面第此時道路不通暫可留在湖南剿辦亦不能專
待事竣緩緩北上俟楚南辦有頭緒仍應速赴湖北
爲是會國藩素明大義諒不敢專顧桑梓置全局於

不問北重於南皖鄂重於楚南此不易之局也

初三日壬寅綏遠城將軍善祿奏言臣於二月二

十七日馳抵東昌知鉅野鄆城俱已失守賊衆
三四千被脅難民無數業經占踞張秋鎮距東
昌府城八十里恐其卽撲府城亟需兵力彈壓
張秋爲三岔總路東北爲茌平正北爲東昌西
北爲冠縣館陶等處逼近直隸大名而東昌水

陸交衝尤爲賊所窺伺張秋鎮橫跨運河中有
橋梁若從東岸進勦賊必由西北竄若從西岸
進勦賊必由東北竄若兩岸分勦又恐其直撲
東昌勢難兼顧因此暫在東昌南關外紮營探
得賊匪三路出哨二十九日賊匪馬步隊數千
竄撲東昌行不數里折回西去隨又探得賊匪
已入陽穀縣城聲言仍撲東昌恐其聲東擊西

意將繞西而北若但取道進擊又恐其仍舊回
撲臣祇得多發偵探嚴兵以待臨清大名各路
在在空虛業已咨明勝保迅爲籌備東昌一帶
曠野平原無險可扼臣惟有擇要堵截相機迎
勦遏其北竄之路奏入

上命軍機大臣傳諭善祿張亮基曰賊衆占踞張秋鎮
又竄入陽穀縣城此股逆匪意在救援阜城善祿現

既與賊相遇著卽趕緊督兵進剿並知會張亮基星速前進爲兩路夾攻之舉若攻剿稍遲該逆非負嵎死守卽乘間紛竄剿辦更難得手昨據僧格林沁勝保等奏已派總兵桂齡等帶兵馳赴德州本日復諭令該大臣等酌量派兵策應著善祿卽催提此次續派官兵遏賊竄路務當以剿爲防萬勿遷延貽誤張亮基所帶之勇改赴東平計日已早到營該逆利在

狂奔臨清大名各路均關緊要此股逆匪卽責成善祿張亮基合力進攻儘有疏虞致令乘隙竄擾朕惟善祿張亮基是問

上又命軍機大臣傳諭僧格林沁勝保曰逆匪勢甚剽疾意在接應阜城之賊必須乘賊蹤未定一鼓殲除毋令勾結爲患著僧格林沁勝保卽酌量添派精兵馳赴善祿軍營無稍遲誤其直隸大名一帶仍嚴飭

張殿元實力巡防妥爲布置該大臣等務當統籌全局權衡輕重斷不准任令匪蹤闖入直境更滋蔓延

初五日

甲辰

勝保奏言連接善祿來函賊陷陽穀

已竄過莘縣仍圖北來援救各處所報賊數或云萬餘或云數萬賊情詭譎其是否應援阜城之賊抑或繞道由他路北犯均未可定善祿等馬步各隊僅三千餘名實覺衆寡不敵即使力

能堵截賊或折而旁竄仍可關入直境與阜城
之賊聲息相通如僅派兵爲善祿後路聲援恐
緩急仍不足恃再四思維不得不於萬難分身
之時爲南北兼顧之策卽於三月初三日選帶
馬步官兵起程至劉智廟確探賊蹤如賊由莘
縣直撲臨清臣由故城武城前進迎頭截殺如
西竄大名臣由邱縣清河一帶橫截總期抑其

兇鋒遏其北竄大名府爲畿輔門戶賊如由莘縣西竄相距甚近張殿元帶兵由武邑改赴大名此時計可趕到大名存城兵勇尙有二千餘名合之張殿元之兵共有五千餘名臣復撥河南練勇數百名前往協防該勇等半係籍隸大名皆有保衛身家之念較他勇爲得力至臣帶往官兵馬步六千餘名其餘各營馬步隊尙有

一萬數千名統留歸僧格林沁以資攻勦阜城
垂斃之賊數不盈萬臣雖分兵前去而所留之
兵其數尙倍於賊惟東省逆氛正熾如果衆至
數萬亡命赴援自必倍形兇悍臣與善祿先後
帶兵萬人勦而兼堵旣須遏南賊之北來並宜
截北賊之南竄俟探確賊蹤將迎勦情形再行
馳奏

勝保又奏言頃據荏平縣高唐州稟報賊已攻陷冠縣三月初一日竄至清河縣屬之小灘地方屯聚又由館陶縣屬之清水莊竄至李官莊距臨清州祇二十五里善祿現抵何處亦未知曾否與賊接仗是否賊匪分股旁竄善祿爲所牽掣抑係中途延緩致落賊後容俟查明再當具奏查臨清州現在十分喫緊幸已豫派藩司

崇恩帶兵馳往或可藉資守禦總兵桂齡已令其由德州先赴故城迎擊臣卽督帶官兵馳赴故城探明賊蹤相機策應

同日張之萬奏言查安徽之賊竟在碭山一帶渡河防河諸臣漫無抵禦任其偷渡臣思機失於事先患宜防於事後此時黃河上流各渡無甚喫重而碭山一帶河口尤關緊要賊旣渡河

擾及山東必與安徽盤踞之賊暗通消息奸細
之來往時時有之且賊在山東如大兵攻剿得
力則安徽之賊必思前來接應更宜防其續行
偷渡現時賊勢尙孤猶易剿辦若不將礪山一
帶趕緊設法扼要嚴防誠恐與安徽之賊任意
往來連爲一氣應請

飭令安徽帶兵大臣分派精銳兵勇時時巡查斷其往

來之路破其聯絡之謀庶於軍務稍有裨益
同日鄭敦謹奏言伏查逆匪攻陷永夏後卽由
豐工漫口偷渡北竄河南歸陳一帶並無另股
逆匪接據各路探報該逆渡黃後由曹單直撲
金鄉濟甯一帶並據拏獲脅從逃出之人供稱
意在救援北路殘賊茲蒙

聖主籌畫萬全已

饒勝保帶兵迎勦山東撫臣亦帶兵南下東北兩面兜
勦自可迅速蕩平計賊敗後北竄無隙可乘南
竄又隔黃河東則有山東撫臣之兵迎擊未必
敢再深入而山東曹郡正當西衝萬一徑由曹
郡西竄則直隸之開州東明河南之考城滑濬
難免蔓延滋擾查現在黃河之南歸德情形較
前已鬆曹郡爲豫省東北門戶必須先有大兵

團練之明驗現在阜城餘賊尙未殲滅淨盡而南來之匪復竄及鉅野鄆城陽穀各縣著桂良張亮基仍遵前旨嚴飭所屬凡未經被賊各府州縣一體勸諭紳民辦理聯莊既可協助兵力卽以自衛身家儘有不肖官吏陽奉陰違均著隨時從嚴叅辦張亮基向東平一路迎勦並未與賊相遇若再不迅速探明賊蹤與善祿分投夾攻任令逆匪北竄必將該撫從重

治罪

上又命軍機大臣傳諭桂明曰逆匪全竄山東連陷金鄉鉅野鄆城陽穀等處情形較歸德尤爲喫緊據鄭敦謹奏請飭桂明速由黃河北岸徑趨曹州一帶迎擊自係先其所急惟逆匪已由莘縣竄入直隸清河縣境鄭敦謹所請意在保山東以固河南就軍情緩急而論惟有徑赴直隸方能迎頭邀擊若專注曹州

已落後著著桂明卽統所帶官兵無論何處渡口星
夜渡河而北沿途遇賊卽行截擊若能開道出奇繞
赴大名以北更可得手斷不准故意紆折致誤事機
上又命軍機大臣傳諭楊以增百勝王夢齡曰賊已攻
陷冠縣並踞館陶縣所屬之地距臨清甚近北路情
形緊急儘再有南來逆匪陸續渡黃與東省之賊接
應勦辦愈難得手楊以增旣專轄黃河百勝等又防

堵徐州業已疏忽於前漫無抵禦若再任該逆偷渡
罪更難追據張之萬奏黃河上流各渡惟碭山一帶
河口最關緊要著楊以增等趕緊設法籌防派精銳
弁兵嚴緝奸宄斷其往來之路並著百勝等卽就現
帶兵勇實力防剿儘仍不知奮勉使逆匪續有偷渡
必將該河督等從重治罪

同日台湧奏言伏查賊匪盤踞漢陽其分股竄

擾德安一帶窺伺北路者多則二三千少亦四五百人可見漢陽賊數正復不少荊州襄陽各路尙無賊蹤惟湖南岳州失守賊竄湘陰前調湖南官兵一二千名尙未起程卽可留於該省派撥布置曾國藩統有全軍一萬七千餘人旣抵湘潭自當分水陸兩路由上壓下迎頭截剿所可慮者岳州之城陵磯對岸卽荆河腦地方

實爲荊州要口賊由此路竄荆甚近不可不防
武昌弁兵布置省垣似尙敷用江西派兵來援
如能及早趕到則聲勢一振而由德安三路進
剿之兵卽可會合夾攻漢陽不難克復江北逐
處搜剿分股竄匪所以遏其北竄卽所以破其
牽掣之計使分竄者翦盡便可三路進兵直搗
賊巢德郡爲南北咽喉重地與荆襄同關緊要

目下附近一帶賊衆未淨未可驟然移兵遠出
前次催調四川松潘建昌兩鎮赴漢應援之官
兵二千名均必道出荊州臣卽截留在荊以便
撥由荊河出口與湖南會剿南北兩省以荊州
一帶爲適中之地江北無大員督兵進剿一時
不能分身臣以總督兼署提督照料難周河南
南陽鎮總兵柏山帶兵出關助剿若以該總兵

就近署理湖北提督則豫楚聯絡一氣呼應更靈而由此分路進剿之官兵得有大員督飭臣卽可分身馳赴荆襄審度南北機宜居中調度魁玉旣已帶兵由武昌上援應卽令其在荆聽候派撥佈克慎現在帶兵由黃郡一帶進剿未便令其遽往湖南以致東路鬆勁奏入

上命軍機大臣傳諭台湧曰楚北逆匪全股盤踞漢陽

其分竄德安一帶之賊前經台湧撥兵截剿業將黃陂縣城攻克必須乘勝進攻將雲夢應城孝感等處餘匪次第殲除方能全軍南注爲肅清漢陽之計武昌存城兵勇足敷布置若將北路得力之兵撤調赴省則江北更屬空虛疊據青麇奏報惟以孤守無援爲詞別無籌辦之策殊不足恃著台湧體察機宜隨時與該撫互爲知照以期聲勢聯絡所謂江西水陸

各軍並著飛提駛赴上游會合迎勦儘能先將江面
疏通則漢陽與武昌南北無阻勦辦庶易得力該督
又稱岳州對岸之荆河腦地方爲荊州要口若竄岳
之賊被勦窮蹙恐由此路旁趨至荆所慮亦不爲無
見仍著台湧兼籌扼截之策於四川松潘建昌兩鎮
官兵提到後卽嚴飭各該員弁將此項兵丁駐紮荆
州以扼賊匪上竄之路仍須探明岳州賊情如須出

境迎擊卽剋期統帶前往與湖南會剿勿以有用之
兵置之無用之地本日已諭令佈克慎署理湖北提
督該員現在黃陂一帶進剿著卽毋庸前赴湖南台
湧身任兼圻一切剿辦機宜惟當妥籌大局迅掃妖
氛以副委任

上諭內閣曰台湧已補授湖廣總督其所署湖北提督
著佈克慎署理該員前由貴州提督獲咎革職因在

黃陂勦賊尙知奮勉是以飭令署理提督仍著台湧
督飭該員迅速帶兵勦辦賊匪以贖前愆